

ՅԱԶԸՃՅԱՆ ԳԵՎՈՐԳ

ՀԱՅ-ԶՐԴԱԿԱՆ ՀԱՐԱԲԵՐՈՒԹՅՈՒՆՆԵՐԸ ԿԱՐՍԻ ՆԱՀԱՆԳՈՒՄ 1919-1920 ԹՎԱԿԱՆՆԵՐԻՆ

Հայաստանի առաջին հանրապետության քաղաքականությունն իր օտարազգի քաղաքացիների նկատմամբ բավարար չափով չի ուսումնասիրվել: Բացառություն են հանրապետության թուրք և թաթար (ադրբեջանցի) քաղաքացիների հետ առնչված իրադարձություններին նվիրված ուսումնասիրությունները:

1878 թվին, Սան Ստեֆանոյի և այն վերանայած Բեռլինի վեհաժողովի արդյունքով տիրանալով Կարսի մարզին, ցարական Ռուսաստանը որդեգրեց ժողովրդագրական այլ քաղաքականություն: Արգելելով հայերի և մուսուլմանների ներհոսքերը մարզի տարածք, այս իշխանություններն անցան մարզն արագորեն ռուսականացնելու ակտիվ քաղաքականության, որպես նախապատրաստություն այս ուղղությամբ Օսմանյան կայսրության մյուս տարածքներ ու «տաք ջրեր» ռուսական հեռագնա ծրագրերի: Մարզում, մասնավորաբար՝ Ալեքսանդրապոլ-Կարս-Մարի-դամիշ երկաթուղու և խճուղու անմիջական մոտակայքում, ռուսական տիրապետության 40 տարիների ընթացքում հայտնվեցին ռուս մոլոկան աղանդավորների շուրջ 40 գյուղեր¹, Նովո-Էստոնկա գյուղում հաստատվեցին վերաբնակիչներ Էստոնիայից: Այսպիսով, մարզի բնակչության ազգային խճանկարը դարձավ է՛լ ավելի խայտաբղետ: Մարզում Առաջին համաշխարհային պատերազմի նախօրյակին ապրում էին բազմա-հազար հայեր, քրդեր, թաթարներ, թուրքեր, կարափափախներ, ռուսներ, հույներ, փոքր քանակով՝ նաև թուրքմեններ², վրացիներ, աջարներ, լազեր, հրեաներ, էստոնացիներ և այլ ազգությունների ներկայացուցիչներ: Ռուսաստանի 1909թ. մարդահամարի համաձայն, Կարսի մարզում ապրում էր 364,700 հոգի, որոնցից 131 հազարը (35,9%) թուրքախոս ժողովուրդների էին պատկանում. հայերը կազմում էին 91 հազար (25,3%), իսկ ռուսները՝ 35 հազար (9,6%)³: Փարիզի խաղաղության կոնֆերանսին ՀՀ պատվիրակության ներկայացրած մի հուշագրում, հիմնվելով Ռուսաստանի 1915 և 1917 թվականների պաշտոնական վիճակագրություն-

ների վրա, հայտնվում է, որ Կարսի նահանգում ապրում են 123,170 հայեր, 158,804 մուսուլմաններ, 4,231 վրացիներ և 118,100 այլ ազգիներ⁴:

1918թ. փետրվարին, թուրքերը շարժվեցին դեպի արևելք: Հայկական փոքրաթիվ ուժերը չկարողացան առաջքն առնել թուրքական հարձակողականին: Ապրիլի 12-ի կեսօրին, Անդրկովկասյան Մեյմի կառավարության նախագահ, վրացի մեմշկիկ Չխենկելու հրամանով, հայկական կորպուսը առանց մարտի թողեց Կարսը և նահանջեց: Հետևեց քաղաքի և նահանգի հայ ազգաբնակչության, նաև հույների և առհասարակ բոլոր քրիստոնյաների գաղթը դեպի Արևելյան Հայաստան, Վրաստան և Հյուսիսային Կովկաս: 1919 թվին Փարիզի կոնֆերանսին ՀՀ պատվիրակության ներկայացրած մի փաստաթղթի համաձայն, միայն Կարսի շրջանից գաղթել են «շուրջ 120,000 հայեր»:

1918 թ. հունիսի 4-ի Բաթումի պայմանագրով, ՀՀ-ը Օսմանյան կայսրությանը զիջեց Կարսի նահանգն ամբողջությամբ: Պայմանագրի հավելվածում, մարզից գաղթածներին իրավունք էր տրվում մեկ ամսվա ընթացքում վերադառնալ իրենց տուն ու տեղին: Հասկանալի է, որ այս «իրավունքը» հայ գաղթականների համար սոսկ հռչակագրային բնույթ ուներ:

Առաջին աշխարհամարտում թուրքերի պարտությունից հետո, Կարսի նահանգում հաստատվեցին բրիտանական իշխանություններն ու զորքերը: Ջորախրամանատար Շյուքրի փաշայի անմիջական մասնակցությամբ, նահանգի թուրքերը, քրդերն ու ռուս մոլեկանները կազմեցին «Ազգային խորհուրդ»՝ «Միլլի շուրա», որը «կառավարում էր» ինքնահռչակ «Հարավ-արևմտյան հանրապետությունը»: 1919 թ. սկզբից, ՀՀ կառավարությունը բանակցություններ վարեց բրիտանացիների հետ՝ նահանգը ՀՀ-ին կցելու նպատակով: Բրիտանացիք չեին շտապում. նրանք հայերին չեին վստահում՝ նրանց ռուսասեր կամ ռուսամետ համարելով: Խնդիրը բարդանում էր նրանով, որ Կարսի նահանգի հյուսիսային շրջանների նկատմամբ տարածքային հավակնություններ ունեւր Վրաստանը⁵: 1919 թ. հունվարի 8-ին, Արևելյան Անդրկովկասում բրիտանական զենքերալ Ֆ. Ուոկլերի և ՀՀ արտգործնախարար Ս. Տիգրանյանի միջև կնքվեց Կարսի նահանգի մասին մի համաձայնություն, որի 10-րդ և 11-րդ կետերը վերաբերում էին ոչ-հայ բնակչության կառավարման ձևին. նշվում էր, որ «մահմեդականները վախենում են հայկական վարչությունից, հետևաբար, անհրաժեշտ է գործել զգուշությամբ և ցրվել ամեն վախ ցույց տալու համար, որ հայերը ընդունակ են մոռանալու ցեղային նախապաշարումները, երբ որ իշխանության գլուխ են կանգնում»⁷: ՀՀ-ի կողմից Կարսի քաղաքացիական նահանգապետ նշանակվեց վարչական Հմուտ և փորձառու գործիչ Ստեփան Դորդանյանը: Հայ-բրիտանական միացյալ զորքերը, առանց զինյալ դիմադրության

հանդիպելու, 1919 թ. ապրիլի 24-ին մտան Կարս: Չորս օր հետո, քաղաքում ամբողջ իշխանությունը փոխանցվեց հայերին: Մայիսի 9-ին հայկական զորքերը մտան ռազմավարական նշանակության Միդիանեկ հունարնակ գյուղը, իսկ ամսի 13-ին՝ Օլթի և Կադզվան: «Քրդերն ու թուրքերը ընդունեցին նրանց աղ ու հացով»:

Այսպիսով, Կարսի ամբողջ մարզը, բացի Օլթիի գավառի արևմտյան մասից, անցավ ՀՀ գերիշխանության տակ: Մկսվեց հայ գաղթականների զանգվածային տունդարձը: Խանդավառված մոտակա տունդարձի հեռանկարով, Կարսի նահանգ տեղափոխվեց արևմտահայ գաղթականների մի զգալի մասը: 1919 թ. երկրորդ կեսին, ըստ ՀՀ պատվիրակության ներկայացրած մի վիճակագրության, Կարսի նահանգում ապրում էր շուրջ 404 հազար մարդ, որից մոտ 160 հազարը՝ մուսուլմաններ, նրանց թվում՝ 55 հազար մուսուլման քրդեր⁹:

Ազատագրելով Կարսի նահանգը, ՀՀ-ը ժառանգեց նաև նահանգում ազգամիջյան բարդ, հաճախ և թշնամական հարաբերությունները, որոնք հարկավոր էր կարգավորել և լծվել խաղաղ, շինարարական աշխատանքի: Հակառակ այս ուղղությամբ նահանգապետ Ստ. Դորդանյանի հետևողական ջանքերի, մինչև նահանգի անկումը 1920 թ. հոկտեմբերի վերջին-նոյեմբերի սկզբին, ՀՀ-ին չհաջողվեց լուծել այս ծայր աստիճան դժվար խնդիրը:

Նահանգում հայ-քրդական հարաբերությունների վատացման տեղիք տվին առաջինը քրդերը: Եթե ցարական իշխանությունը կարողանում էր երկաթե բռնուցքով խաղաղ հարաբերություններ պահպանել այս երկու ժողովուրդների միջև, ապա՝ 1918 թ. սկզբին, թուրքական հարձակման ժամանակ, քրդական հրոսակախմբերը մեծ աշխուժություն ցուցաբերեցին հայոց և հույների ունեցվածքը թալանելու և նրանց կոտորելու գործում¹⁰: Քրդերը մեծ թիվ էին կազմում նաև Ջավիդ բեյի 11-րդ դիվիզիայի կազմում, որը 1918 թ. մայիս-հունիսին հայոց ահավոր կոտորածներ հրազործեց Լոռու և Փամբակի շրջաններում¹¹: Թարմ էր նաև Մեծ եղեռնի իրագործման մեջ քրդերի ակտիվ մասնակցության հիշատակը: Հասկանալի է, որ հայերը քրդերից դաժան վրեժ էին լուծելու, որն էլ փոխվրեժ էր առաջ բերելու, և այսպես շարունակ: Արդեն 1918թ. առաջին կեսին, նահանջող հայերն ու հարձակվող թուրքերն ու քրդերը դաժանորեն կոտորեցին հակառակորդի խաղաղ բնակիչներին¹²:

Հասկանալի ու արդարանալի է, որ 1919 թ. կեսերից տուն դարձող գաղթականները լցված լինեին վրեժի զգացումներով: Անարդարանալին և ՀՀ-ի համար նույնիսկ ողբերգական հետևանքների առաջնորդողը, սակայն, վրիժառության պիտակի տակ հայ բաշխրոզուկների կատարած բռնություններն ու կամայականություններն էին: Այս մասին կան բազմաթիվ վկայություններ¹³:

Ալ. Խատիսյան, որի վարչապետության օրոք իրականացվեց Կարսի մարզի կցումը Հայաստանի Հանրապետությանը, մարզում ՀՀ իշխանությունների հետապնդած «չորս գլխավոր նպատակներից» երրորդն է հիշատակում «խաղաղեցնել բնակչության մուսուլման տարրը և հաշտեցնել զայն քրիստոնյա զանգվածին հետ»¹⁴:

ՀՀ-ը ազգային փոքրամասնությունների նկատմամբ չուներ հստակ քաղաքականություն: Կարսի նահանգում, տեղական ոչ-հայ տարրերի նկատմամբ ևս չկար պետական հստակ քաղաքականություն: Հայկական իշխանության հաստատումից մինչև Կարսի անկման օրը, ՀՀ քաղաքացիական և զինվորական իշխանությունների միջև Կարսի նահանգում գոյություն ունեին թշնամության հասնող հակամարտություններ, որոնցում կարևոր տեղ էր զբաղեցնում այլազգի տարրերի նկատմամբ վարվելիք քաղաքականության ուղղվածությունը: Երկու կողմերի բևեռներն էին՝ մի կողմից նահանգապետ Ստեփան Դոդոյանյանը, մյուս կողմից՝ Կարսի բերդապետ, գեներալ-լեյտենանտ Դանիել Բեգ Փիրումյանը և նահանգի զորամիավորումների անմիջական հրամանատար գեներալ-մայոր Հովսեփյանը: Իսկ Հայ հեղափոխական դաշնակցության տեղական գործիչների մի մասը հակվում էր այս, մյուս մասը՝ այն խմբին: Այս երկվորյունը ճակատագրական եղավ ամբողջ նահանգի համար:

Ստեփան Դոդոյանյանը հակված էր խաղաղ միջոցներով, ուժի ցուցադրումով, բայց ոչ այն անպայմանորեն գործադրելով սիրաշահել նահանգի մուսուլման բնակչությանը, և, մասնավորաբար, քրդերին¹⁵: Դոդոյանյանին հակառակ, նրա իսկ բնորոշումով, «ջարդել-փշրելու» քաղաքականության կողմնակից էին և դա կիրառում էին նահանգի հայկական զորամիավորումների բարձրաստիճան սպաները:

Կարսի նահանգում հայ-քրդական հարաբերությունները ունեցել են հիմնականում տնտեսական բովանդակություն: Քրդերը բնակվում էին լեռնային շրջաններում ու առավելապես զբաղվում անասնապահությամբ: Նրանց տնտեսական գործընկերները եղել են հիմնականում հայերը: «Կարսիցի բոլոր հայերը կապված էին նահանգի բոլոր նշանավոր քրդերի հետ բազմաթիվ գործնական, տնտեսական, առևտրական կապերով»¹⁶: Մինչև Առաջին աշխարհամարտը, «հայերի խաշնարած տնտեսությունը գտնվում էր բացառապես քրդերի ձեռքում»¹⁷: Հայերն իրենց տավարը քրդերին «յուղով կտային», այսինքն՝ աշունը նրանց հանձնած իրենց անասուններին հետ էին վերցնում նորածին ձագերի հետ՝ խնամող քրդերին թողնելով այս ժամանակահատվածում ստացված յուղը (կարագը): Քրդերի մրցակիցներն էին գյուղական շրջաններում ապրող, անասնապահությամբ և մեղվաբուծությամբ զբաղվող հույները: Այս մրցակցությունը 1918-1920 թվականներին վերաճեց թշնամության և փոխադարձ կոտորածների ու թալանի:

1919-1920թթ. Կարսի նահանգում հայ-քրդական հարաբերությունների վրա իրենց կնիքն էին դրել մաս մինչ այդ թվականները նահանգում քուրք-քրդական, ռուս-քրդական և վրացա-քրդական հարաբերությունները: Թե՛ քուրքերը և թե՛ վրացիները միշտ կեղեքել են քրդերին, նրանց համարել երկրորդ կարգի մարդիկ, և շահագործել նրանց, հաճախ դիմելով մույնիսկ բռնությունների: Ռուսները ևս շահագործում էին քրդերին, սակայն միաժամանակ աշխատում էին սիրաշահել նրանց՝ Անատոլիայի խորքերը իրենց հետագա հառաջխաղացման ծրագրերին ծառայեցնելու համար սահմանի երկու կողմերում ապրող քրդերին: Այսուհանդերձ, քրդերը այդքան էլ զոհ չեին ռուսական իշխանություններից:

Հետևաբար, քրդերը հույս ունեին, որ հայկական իշխանությունը վերջ կտա իրենց նկատմամբ նախորդ իշխանությունների արհամարհական կամ թշնամական վերաբերմունքին, սակայն տեղի ունեցավ ճիշտ հակառակը, ինչպես պիտի տեսնենք:

Հայ-քրդական հարաբերությունների բնականոնացմանն էր նպատակամիտված 1919 թ. ամռանը Երևանում ստեղծված հատուկ մարմինը՝ քրդերի պետքերը հոգալու համար. նախատեսվում էր հանրապետության քրդաշատ վայրերում, հատուկ քրդերի համար բացել դպրոցներ, հիվանդանոց, դեղատուն, սպառողական խանութ և այլն: Այդ մարմնին ամրանակցում էին երիտասարդ իրավաբան Պարույր Լևոնյանը (Աշուղ Ջիվանու որդին) և քրդագետ Լազոն: Սակայն, ծրագիրը ձախողվեց, քանի որ կառավարությունը միջոցներ, փող չուներ¹⁸:

Քրդերի նկատմամբ նահանգապետ Ղարղանյանի բարյացական քաղաքականությունը դրսևորվում էր բազմաթիվ առիթներով. նա ազդեցիկ քրդերի պաշտոնների էր նշանակում, մի քանիսին շնորհում զենք կրելու իրավունք և այլն: Նա ծրագրել էր նահանգի քուրդ երևելիների գլուխն անցած, հատուկ զնացքով նրանց տանել Երևան, ներկայացնել կառավարությանը և վերջինիս կողմից նրանց պատիվների արժանացնել: Այս ծրագիրը տապալվեց 1920 թ. մայիսյան բուլշևիկյան խռովությունների պատճառով¹⁹:

Նահանգապետ Ղարղանյանը մույնիսկ փորձեր է արել կապեր հաստատելու սահմանից այն կողմ գտնվող քրդական աշիրաթապետների հետ, այդպիսի հանձնարարություններով մարդիկ ուղարկել Ալաշկերտ, Վան և Կարին, ու այդ մասին իմաց տվել ներքին գործերի նախարարին: Դրանով, Ղարղանյանն աշխատում էր բարենպաստ պայմաններ ստեղծել արևմտահայ տարագիրների հայրենի եզերք վերադարձի համար: «Բայց պետք չկա ասելու, - դառնությամբ գրում է նա, - որ այդ բարդ և մեծ գործը պահանջում էր մեծ միջոցներ և բազմաթիվ ինտելիգենտ ուժեր, որ չուներ մեր կառավարությունը»²⁰:

Ղորղանյանն աշխատեց հանրապետության շահերին ծառայեցնել մասնաշաղկապ կոչված «հաչող քրդերի» աղանդին²¹, որը վերահայտնվել էր Կարսի մահանգի Կաղզվանի գավառում: Ղորղանյանը, գավառապետ Պալյանի միջոցով կապ հաստատեց աղանդի ղեկավար շեյխ Հյուսնիի հետ՝ քրդության մեջ «լոյալ, հանգիստ և մեզ բարեկամ մթնոլորտ ստեղծելու» նպատակով²²: Այս մասին մահանգապետը ծածկագրված գաղտնի գեղուցում է ուղարկում Երևան, բայց կառավարությունից ոչ միայն այս ծրագրի համար փող, միջոցներ և հրահանգներ, այլ մույնիսկ պատասխան չի ստանում և ծրագիրը տապալվում է²³:

Մի քիչ մանրամասն ներկայացնենք մահանգում հայ-քրդական հարաբերությունները էականորեն բարելավելու և ՀՀ-ի նկատմամբ քրդերի հավատարմությունը ամրապնդելու միտված, Ստ. Ղորղանյանի երեք այլ նախաձեռնությունները:

1. Պաշտոնական մեծ շքախմբի ուղեկցությամբ վարչապետ Ալ. Խատիսյանի այցելությունը Կարսի մահանգ՝ 1919 թ. նոյեմբերի 2-ից 6-ը: Նահանգապետի և իր շքախմբի հետ, վարչապետը այցելեց մաս քրդաբնակ շրջաններ, եղավ Սարիղամիշում, Կաղզվանում, Մերդենեկում և Աքդահանում: Ժողովուրդը, մասնավորաբար քուրդ ազգաբնակչությունը, բացառիկ պատիվներով ընդունեց նրանց: Նահանգապետի առաջարկությամբ, վարչապետը հայկական բանակի սպայական ուսադիրներ և զինվորական կոչումներ շնորհեց մի քանի քուրդ երևելիների, ինչը մեծ գոհունակությամբ ընդունվեց քրդերի կողմից: Այդ երևելիների շարքին էր Կաղզվանի շրջանում բնակվող կասկանցի (զիլանցի) աշիրեթի պետ Հասան բեգը, որը շքախմբին դիմավորել էր 200 ձիավորներով և արժանացել հայկական սպայության երկրորդ աստիճանին²⁴: Վարչապետը «հանձնարարեց մահանգապետին մի գումար նվիրաբերել երաշտից վնասված մի երկու քուրդ գյուղերի»²⁵:

2. Նախիջևանցի թաթար Իբրահիմ Կադիմովի նշանակումը Արդահանի գավառապետի պաշտոնին: Կադիմովը, շատ չանցած, ամուսնացավ մի քրդուհու հետ, իրեն շրջապատեց քուրդ հեծյալ թիկնապահներով և զանազան այլ ձևերով սիրաշահեց գավառի քրդությանը: Կադիմովը կարևոր դեր ունեցավ գավառում մեծ ազդեցության տեր, վրացական շահերի պաշտպան, աջարացի Ջեմալ բեգ Խամշիկի ազդեցության չեզոքացման գործում²⁶: Կադիմովի միջոցով գավառի քրդության հավատարմությունը ՀՀ-ին դրսևորվեց մասնավորապես կառավարության նախաձեռնած, Հայաստանի անկախության փոխառությանը ակտիվ մասնակցության մեջ: Կադիմովի միջոցով, Ղորղանյան կապ հաստատեց ազդեցիկ քուրդ հրոսակապետ, քեմալականների էրգրումի համագումարի պատգամավոր Ջաֆար բեգի հետ²⁷: Կադիմովից Ղորղանյանն ստանում էր քրդերի միջոցով ձեռք բերված հետախուզական տվյալներ սահմանի մյուս կողմում

թուրքական զորքերի տեղաշարժերի ու ծարգրերի մասին և այդ տեղեկություններն անհապաղ փոխանցում էր Երևան:

Մակայն, Կարսի բարձր հրամանատարությունը հենց սկզբից թշնամաբար տրամադրվեց նահանգապետի հովանավորությունը վայելող Կադիմովի նկատմամբ: Դա հատկապես դրսևորվեց 1920. մայիսի վերջին, երբ Ղորղանյանն առաջին անգամ մեկնել էր Երևան. Կադիմովին զրպարտության հիման վրա բանտարկելու փորձ արեցին զեներալները՝ կամավորականների խմբապետ, քրդերին հարստահարող Մուրադի միջոցով: Ղորղանյանին հազիվ հաջողվեց կառավարության միջոցով տապալել զինվորականների այս դավադրությունը: Նույն օրերին, նույն զինվորականների դրդումով և առանց նահանգապետի կարծիքը հարցնելու, Կարսի նահանգի Աբդահամի գավառից անջատվեցին Ջարուշատի և Աղբաբայի մուսուլմանաբնակ շրջանները ու միացվեցին Ալեքսանդրապոլի նահանգին: Դա ամրագրվեց ՀՀ կառավարության 1920թ. մայիսի 25-ի նիստում ընդունված, ՀՀ վարչական բաժանման օրենքում²⁹:

3. Ջինվորական ցուցադրական զբոսանք-երթի կազմակերպման նախաձեռնությունը, որը նպատակ ուներ ահ ազդել նահանգի մուսուլման ամհանգիստ տարրերի վրա՝ նրանց զգուշացնելով ՀՀ-ի նկատմամբ թշնամական քայլերի հետևանքներից: 1919 թ. օգոստոսի 30-ին նախատեսված այս ցուցադրությունը բարձր զինվորականության, մասնավորաբար զեներալ Հովսեփյանի ձգձգումների հետևանքով, և Ղորղանյանի՝ այս մասին կառավարությանը 17 դիմում-հեռագիրներից հետո²⁹, տեղի ունեցավ 1920 թ. հունվարին՝ ուղեկցված ավելորդ ու չհիմնավորված խստություններով, տալով նախատեսվածից հակառակ արդյունքը:

Քրդերի նկատմամբ հավեհարդար տեսնելու և նրանց ունեցվածքը թալանելով յուրացնելու իրենց մոլուցքի մեջ, զեներալներն ու զնդապետները շահագործեցին նաև քրդերի նկատմամբ թշնամությամբ ու վրիժառությամբ լցված հույներին և հայկական կամավորական խմբերին: Հույներից կազմվեցին առանձին զորամիավորներ: 1920 թ. հունիսին, «հենց մեր զորաբանակը անցավ դեպի Օլթի, այդ հույները հարձակվեցին Օլթիի գավառի խաղաղ քուրդ գյուղերի վրա»³⁰: Հայ կամավորների կողքին, հույները հիմնականում զբաղված էին քրդերին իրենց բնակավայրերից քշելով և նրանց տավարի ու ոչխարի հոտերը, զորգերն ու այլ ունեցվածքը հօգուտ իրենց և բարձր հրամանատարության թալանելով³¹: Այս անիդավությունների մասին նահանգապետ Ղորղանյանի Երևան անընդհատ տեղացող հաղորդագրություններն ու բողոքագրերը մնում էին անհետևանք, քանի որ բարձր սպայությունը վայելում էր 1920 թ. մայիսից իշխանության փաստական մեծատեր, զբաղ և ներքին գործերի նախարար Աուրեն Տեր-Մինասյանի հովանավորությունը:

Արդյունքը, ինչպես նշեցինք, եղավ քրդերի թշնամացումը ՀՀ-ի նկատմամբ: Իրենց բնակավայրերից բշված փախստական քրդերը ապաստան գտան սահմանի մյուս կողմում, ուր իրենց քարոզչությանը է՛լ ավելի զորոնեցին իրենց ազգակիցներին հայերի դեմ: Վերջիններին հետ նրանք մասնակցեցին Քյազիմ Կարաբեքիրի՝ 1920 թ. աշնանային արշավանքին, որն ավարտվեց Կարսի խայտառակ անկումով, Հայրենիքի տարածքների կորստով և անկախ պետականության վերացումով:

1920թ. հունիսին Օլթիի ուղղությամբ հայկական զորքերի հառաջխաղացքի բուն նպատակն էր ճանապարհ հարթել դեպի Մև ծով ելքի համար³²: Օլթի մուտքի ժամանակ տեղի քուրդ բնակչության նկատմամբ ապօրինի գործողությունները է՛լ ավելի հրահրեցին ՀՀ-ի նկատմամբ քրդերի թշնամական զգացումները: Ձիմվորականները չխորշեցին նման գործողություններ թույլ տալ մույնիսկ Ղորղանյանի կողմից Օլթիի գավառապետ նշանակված քուրդ Էզո բեգի նկատմամբ. նրանց ծառայող կամավորականները սպանեցին գավառապետի երկու հովիվներին և թալանեցին նրա 800 գլուխ ոչխարը: Օլթիի բնակչության կեսից ավելին փախչեց սահմանի թուրքական կողմը: Ըստ Մտ. Ղորղանյանի՝ Օլթիի քրդաբնակ շրջանում թալանվել է 32 հազար գլուխ տավար և ոչխար, որոնք իրացվում էին Վրաստանում, իսկ զորքերը, ցորենն ու այլ իրերը, որպես ավար, տեղափոխվում էին Կարս և Ալեքսանդրապոլ և այնտեղ հավաքում³³:

Մեպտեմբերի 18-ին, Կարսի նահանգի մուսուլմանների նկատմամբ ապօրինի գործողություններին վերջ տալու պատրվակի տակ, Քյազիմ Կարաբեքիրի զորքերն ու քրդական հրոսակախմբերը սկսեցին պատերազմը ՀՀ-ի դեմ: Հայկական զորքը, միայն թույլ դիմադրություն ցույց տալով, իրար հետևից դատարկեց Օլթին, Կադզվանն ու Մարիդամիշը և նահանջեց Կարսի ուղղությամբ: Ամրացված բերդաքաղաքը, ազգային ռզմ բացակայության և հաղթանակի կամքի չգոյության պատճառով³⁴, առանց լուրջ դիմադրության, խայտառակ կերպով թուրք-քուրդ միացյալ ուժերի ձեռքը հոկտեմբերի 30-ի կեսօրին: Կարսի վրա հարձակվող թուրքական զորքերի հառաջապահի դերը կատարում էին քուրդ ձիավորները³⁵, որոնց թիվը, ըստ գերի ընկած մի թուրք սպայի, 1000 հոգի էր³⁶: Այդ ձիավորների առաջին շարքում էին նահանգից փախստական քրդերը: Ըստ Կարսի անկման ականատես Արտաշես Բաբայանի՝ հոկտեմբերի 30-ին, «մինչև ուշ երեկո տաճկական մի գումարտակ միայն, քուրդ ձիավորներով, գրաված պահեց քաղաքը»³⁷: Հոկտեմբերի կեսերին, հայկական բանակի ռազմական մի զեկույցում հայտնվում էր, որ «թուրքական բանակին կընկերանա քուրդ ձիավոր զորամասս մը Մալազկերտի Քեռո Հյուսեյն փաշայի և իր մարդոց ղեկավարությամբ»³⁸, իսկ

Իզդիրի և Երևանի ուղղությամբ գործում էին Մասիսի և Կողբի քուրդ ձիավորները³⁹:

Դեպի Հայաստանի խորքերը հառաջացող քուրդական զորքերի կողքին կռվող քրդերը առանձնահատուկ դաժանությամբ վարվեցին Կարս քաղաքի և նահանգի հայ ազգաբնակչության հետ, անխնա բռնաբարելով, կոտորելով ու սպանելով, վրեժ լուծելով իրենց ազգակիցների նկատմամբ կատարված դաժանությունների համար⁴⁰:

Նոյեմբերի երկրորդ կեսին, ՀՀ-ը վերջնականապես պարտվեց հայ-քուրդական պատերազմում, և որպես անկախ հանրապետություն, դադարեց գոյություն ունենալուց:

Կարսի նահանգը Ալեքսանդրապոլի, Մոսկվայի և Կարսի իրարահաջորդ համաձայնագրերով անցավ Թուրքիային, մի իրավիճակ, որը հակառակ Երկրորդ աշխարհամարտից հետո դրանք հետ բերելու Խորհրդային Միության կատարած փորձերի, շարունակվում է առ այսօր:

Ամփոփելով՝ լիովին համաձայն ենք Կարսի նահանգապետ Մտեփան Դորդանյանի հետևյալ գնահատականի հետ. «Մենք ունեինք բոլոր տվյալները Կարսի նահանգը մեծ պատմեշ դարձնելու քուրդական հարձակումների դեմ: Կարսի նահանգը ավելի քան կեսով բնակեցրած էր քրդերով⁴¹, որ այնպես տրամադիր էին մերձենալու մեզ: Իսկ մենք, փոխանակ կռիվելու այդ տրամադրությունը, ... փոխանակ սպառնալից բռնուցք ստեղծելու մեր սահմաններում, մենք հետ մղեցինք դեպի մեր հովանին նետվող այդ քրդերին:

Եվ մենք առատորեն հնձեցինք մեր ցանածը»⁴²...

YAZCHYAN GEVORG

THE ARMENIAN-KURDISH RELATIONS IN THE KARS PROVINCE OF THE REPUBLIC OF ARMENIA IN 1919-1920

(Summary)

After the defeat of the Ottoman Empire in the World War I, the Kars oblast of the Russian Empire was occupied by British forces. Great Britain passed to the jurisdiction and sovereignty of RA in April 1919.

The population of the province consisted of many nationalities, the majors of which were the Armenians, the Kurds and the Turks.

The policy of the authorities of RA towards the Turkish and Kurdish population of the province varied diametrically between the military and the civil authorities, and specially the covernor Stepan Ghorghanyan followed a tolerant policy, the military inclined to the force, sometimes permitting violence towards the Kurds. The majority of the Kurds, who expected tolerance from the Armenian authorities were looted and forced to deport.

This led them to join the Kemalists during the Turko-Armenian War of 1920, which lasted with the fall of Kars and the collapse of the Armenian independent state. Thees, the leadership of RA, with his false policy towards the Kurds, anverted them from potential sattelities to actual enemies, a factor that antributed led by Karabekir Pasha.

ԾԱՆՈԹԱԳՐՈՒԹՅՈՒՆՆԵՐ

1. Ռուս վերաբնակիչների թիվը 1916. սկզբին անցնում էր 9 հազարից. տե՛ս - Վահե Արծրունի, Հայ-թուրքական պատերազմը - Հայ սպայությունը - Շատախ, Երևան, 2002, էջ 408-409, ծանոթագրություն 24 (ծանոթագրող՝ Գեղամ Բադալյան):
2. Օրինակ, թուրքմեններով բնակված գյուղեր էին Թիխմիսը, Սուփանազատը և Գոթանլուն (Վահե Արծրունի, նշվ. աշխ., էջ 419, ծանոթագրություն թիվ 102; էջ 420, ծանոթագրություն թիվ 106):
3. Armenia - Political and Ethnic Boundaries (այսուհետև՝ APEB), compiled and edited by Anita Burdett, London, 1998, p. 351.
4. APEB, p. 487. Մոտավորապես նույն թվերն է նշում նաև Ալեքսանդր Խատիսյանը, հայտնելով թե թուրքերն ու թաթարները կազմում էին 102,860, քրդերը՝ 54,931 հոգի. տե՛ս Ալեքսանդր Խատիսյան, Հայաստանի Հանրապետության ծագումն ու զարգացումը, «Հայրենիք» ամսագիր, Բոստոն, ապրիլ 1925թ., էջ 49:
5. APEB, p. 447. Ալ. Խատիսյան Կարսի հայ զաղթականների թիվ է նշում «մոտ 100.000 հոգի». տե՛ս Ալ. Խատիսյան, նշվ. աշխ., էջ 49:
6. Այս հարցը առերևոյթ կարգավորվեց 1919թ. զարմանը Ալ. Խատիսյանի Թիֆլիս կատարած այցելության ժամանակ: Վրաստանին թողնվեցին Կուր գետի ձախափնյա տարածքները. տե՛ս Ալ. Խատիսյան, նշվ. աշխ., էջ 49: Այսուհանդերձ, վրացիք չդադարեցին հավակնել մարզի տարածքներին, նույնիսկ անդրքուլիսային բանակցություններ վարելով քմայականների հետ:
7. Միմոն Վրացյան, Հայաստանի Հանրապետություն, Բ. հրատարակություն, Երևան, 1993, էջ 257:
8. Ս. Վրացյան, նշվ. աշխ., էջ 261:
9. APEB, pp. 455, 470-471.
10. Ս. Վրացյան, նշվ. աշխ., էջ 89-90; քծիշկ Հովակիմ Մելիքյան, Արյան ճանապարհով, «Հայրենիք» ամսագիր, Բոստոն, ապրիլ 1925, էջ 133 և այլն:
11. Ս. Վրացյան, նշվ. աշխ., էջ 211-212:
12. Ս. Վրացյան, նշվ. աշխ., էջ 70-71, 94, 96:
13. Սեպուհի հրամանատարած 4-րդ քրիզադայում զրազիր ծառայած անանուն հեղինակ, Ազատ, անկախ և միջյալ Հայաստանի վերջին օրերը, Երևան, 1994, էջ 3; Գարեգին հպս. Հավսեփյանց, Կյանքիս ամենադժբախտ օրը և երջանկությանս թոպեն, Դ. հրատարակություն, Երևան, 2002, էջ 35; Գարեգին հպս. Հովսեփյանց, Կարսի անկումը 1920թ. - Օրագրություն, Բանբեր Հայաստանի արխիվների, 1989, թիվ 3, էջ 131; Վահե Արծրունի, նշվ. աշխ., էջ 29, 30, 31, 59, 67, 73, 94, 124, 153, 156, 384; Արտաշես Բաքալյան, Կարսի անկումը, «Հայրենիք», հոկտ. 1923, էջ 62; Կարո Սասունի, Հայ-թուրքական

- պատերազմը, «Հայրենիք», 1926, թիվ 6, էջ 87-88; նաև Հայաստանի Հանրապետության Պատմության կենտրոնական պետական արխիվ (այսուհետև ՀՀ ՊԿՊԱ), ֆոնդ 477, ցուցակ 1 (Մտեփան Դորդանյանի հուշագրությունը):
14. Ալ. Խատիսյան, Հայաստանի Հանրապետության ծագումն ու զարգացումը, «Հայրենիք», ապրիլ 1925, էջ 50:
 15. Մտ. Դորդանյանը իր դեռևս անտիպ հուշերում (ՀՀ ՊԿՊԱ, ֆ. 477, ց. 1) շատ տեղերում գրում է քրդերին իր համակրության մասին, երբեմն հասնելով մինչև իսկ քնարական զեղումների նրանց հասցեին:
 16. ՀՀ ՊԿՊԱ, ֆ. 477, ց. 1, գ. 7, 1-ին մաս, ք. 75:
 17. Նույնը, ք. 74:
 18. Նույնը, ք. 80:
 19. Նույնը, ք. 81-82:
 20. Նույնը, ք. 88-89:
 21. Աղանդն ստեղծվել էր Արևմտյան Հայաստանում, 1890-ական թվականներին: Նա խաղաղություն էր քարոզում և մերժում չարությունը: Այդպես էր կոչվել անդամների աղոթքի ժամանակ երկինք նայելով հաշոցի մասն ձայներ արձակելու համար: Ցարական իշխանությունների կողմից խստորեն ճնշվելուց հետո, 1915-1916թթ.-ին, պատերազմական գործողությունների հետևանքով, այս աղանդը վերստին հայտնվել էր ասպարեզում:
 22. ՀՀ ՊԿՊԱ, ֆ. 477, ց. 1, գ. 7, 1-ին մաս, ք. 104:
 23. Նույնը, ք. 105-106:
 24. ՀՀ ՊԿՊԱ, ֆ. 477, ց. 1, գ. 7, 2-րդ մաս, ք. 198-199: Հաշվի առնելով Հասան րեզին ընծայված այս պատիվը, 5-րդ գնդի հրամանատար գնդապետ Շաղուրաթյան (այլ աղբյուրներում գնդապետի ազգանունը նշվում է Շահրուդադյան ձևով) 1920թ. աշնանը Կաղզվանը պարպելու ժամանակ նրան է հանձնարարում զավառում մնալ ցանկացող հայոց կյանքի և ինչքի ապահովությունը, տե՛ս Վահե Արծրունի, նշվ. աշխ., էջ 96-97:
 25. ՀՀ ՊԿՊԱ, ֆ. 477, ց. 1, գ. 7, 2-րդ մաս, ք. 207:
 26. Օգտվելով 1920թ. օգոստոս-նոյեմբերի հայ-թուրքական պատերազմից, վրացիք վերստին քացահայտեցին իրենց նկրտումները Արդահանի, Օլթիի և Գլդրի շրջանների, ինչպես նաև Լոռի-Փամբակի նկատմամբ:
 27. ՀՀ ՊԿՊԱ, ֆ. 477, ց. 1, գ. 7, 1-ին մաս, ք. 115:
 28. Օրենքի շարադրանքը տե՛ս «Գոլոս Արմենիի» ռուսերեն օրաթերթ, Երևան, 2002թ., մայիսի 28, էջ 1:
 29. ՀՀ ՊԿՊԱ, ֆ. 477, ց. 1, գ. 7, 1-ին մաս, ք. 232:
 30. ՀՀ ՊԿՊԱ, ֆ. 477, ց. 1, գ. 7, 2-րդ մաս, ք. 263-264:
 31. Վահե Արծրունի, նշվ. աշխ., էջ 67:
 32. Համաձայն չենք պատմական գիտությունների թեկնածու Կտրիճ Մարդարյանի այն գնահատականի հետ, որ հայկական զորքերի առաջխաղացքը և Օլթիի գրավումը քայլեր էին, «որոնք ավելի շատ համընկնում էին թշնամու ծրագրերին»։ տե՛ս Կտրիճ Մարդարյան, Հայ-վրացական հարաբերությունները 1918-1921թթ, Երևան, 2002, էջ 138: Նման գնահատականը ճիշտ ենք գտնում այլազգի ազգաբնակչության նկատմամբ զորքերի ապօրինի գործողությունների համար միայն: Ինչպես ճիշտ է նկատել տալիս Արտաշես Բալայանը, «մեր զորքի կողմից գործված բռնությունները իսկա՛մ ազգաբնա-

- կության վրա պատրվակ էին տաճիկ փաշաների համար, և երբեք պատճառ չէին պատերազմի»։ տե՛ս Արտաշես Բաբայան, Կարսի անկումը, «Հայրենիք», հոկտ. 1923, էջ 64:
33. ՀՀ ՊԿՊԱ, ֆ. 477, ց. 1, գ. 7, 2-րդ մաս, ք. 264-268:
 34. Տե՛ս Գևորգ Յազըճյան, Ոգուն չապավինելու արդյունքը, Երևան, 2002, էջ 10, 12:
 35. Վահե Արծրունի, մշվ. աշխ., էջ 271:
 36. Նույնը, էջ 290-291:
 37. Արտաշես Բաբայան, Կարսի անկումը, «Հայրենիք», հոկտ. 1923, էջ 62:
 38. Կարո Մասունի, Հայ-թուրքական պատերազմը, «Հայրենիք», 1926, թիվ 6, էջ 83:
 39. Նույնը, էջ 95:
 40. Գարեգին արք. Հովսեփյանց, Կարսի անկումը 1920թ. - Օրագրություն, «Բանբեր Հայաստանի արխիվների», 1989, թիվ 3, էջ 129-131, 157:
 41. Ստ. Ղորղանյան խիստ չափազանցում է քրդերի քանակը Կարսի մահանգում: Նրանք կազմում էին քնակչության 14 տոկոսից էլ պակաս:
 42. ՀՀ ՊԿՊԱ, ֆ. 477, ց. 1, գ. 7, 1-ին մաս, ք. 85-86: